

Meeqqamik paarisassamik inissiinermi sulinngiffeqartarneq pillugu Namminersorlutik Oqartussat nalunaarutaat

Naartunermi, erninermi meeravissartaarnermilu sulinnngiffeqartarneq ullormusiaqartarnerlu pillugit Inatsisartut inatsisaat nr. 14, 7. december 2009-imeersoq § 14, imm. 5 tunngavigalugu imatut aalajangersaavigineqarpoq:

Meeqqamik paarisassamik inissiinermut atatillugu sulinnngiffeqartarneq

§ 1. Meeqqanik inuusuttunillu ikiorsiisarneq pillugu inatsisartut peqqussutaat naapertorlugu meeqqamik pingasut inorlugit ukiulimmik ilaqtariinnut inissiisoqartillugu, meeqqap tiguneranut atatillugu, angajoqqaarsiat arlaata sulinnngiffeqarnissaa, kommunalbestyrelsip aalajangiivigisinnaavaa.

Imm. 2. Meeraq, ilaqtariinnut innissinneqartoq, pingasut aamma aqqaneq-marluk akornanni ukioqarpat, sulinnngiffeqarneq sapaatip akunneri marluk angullugit sivilissuseqarsinnaavoq.

Imm. 3. Imm. 1 imaluunniit 2 malillugu sulinnngiffeqarneq taamaallaat akuerineqarsinnaavoq, inissiineq ukioq ataaseq sivilissuserusumilluunniit sivilissuseqassappat, tamanna meeqqanik inuusuttunillu ikiorsiisarneq pillugu inatsisartut peqqussutaanni iliuusissatut pilersaarusernermi aalajangersakkat naapertorlugit pisinnaavoq.

§ 2. Kommunalbestyrelsi sulinnngiffeqarnissamut akuersissuteqarsinnaavoq, meeqqamik paarsinissamut akuersissuteqarnermi, angajoqqaarsiat arlaata angajoqqaarsianngornermi meeqqap angerlarsimaffimmi paarineqarnissaa, meeqqamut pisariaqartoq kommunalbestyrelsip nalilerpagu.

Imm. 2. Angajoqqaarsiat, angerlarsimaffiup avataani tamarmik suliffeqarpata, arlartik sulinnngiffeqassanersoq, namminneq aalajangissavaat.

Imm. 3. Kisimiittumut paarsinissamut akuersissummik tunniussinermi, angerlarsimaffiup avataani suliffeqartumut kommunalbestyrelsi sulinnngiffeqarnissamut akuersissuteqarsinnaavoq.

Imm. 4. Angerlarsimaffiup avataani suliffeqarnermut ilaapput aalajangersimasumik suliffeqarneq, atuarneq, ilinniagaqarneq, il. il.

§ 3. Meeqqamik ataaseq inorlugu ukiulimmik ilaqtariinnut inissiisoqartillugu, nalinginnaasumik piffissaq sulinnngiffeqarfiusussaq tamakkerlugu sulinnngiffeqartitsisoqartarpoq, tamanna Naartunermut, erninermut meeravissartaarnermullu atatillugu sulinnngiffeqartarneq ullormusiaqartarnerlu pillugit Inatsisartut inatsisaanni § 7 imm. 1 aamma 2 naapertorlugit pisinnaavoq.

Imm. 2. Meeqqamik ataaseq pingasullu akornanni ukiulimmik ilaqtariinnut inissiisoqartillugu,

sulinngiffeqarnissap sivilissusissaa meeqqamut iliuusissatut pilersaarussiaq tunngaviusussaq naapertorlugu nalilersuereernermi akuersissutigineqartarpoq, tamanna meeqqanik inuusuttunillu ikiorsiisarneq pillugu inatsisartut peqqussutaat naapertorlugu pisinnaavoq.

Imm. 3. Meeqqamik pingasut aamma aqqaneq-marluk akornanni ukiulimmik inissiisoqartillugu, sapaatip akunneri marluk angullugit sulinngiffeqartitsisoqarsinnaavoq, tamanna § 1, imm. 2 naapertorlugu, meeqqamik ilaqtariinnut, siornatigut meeqqap attaveqarfigisimanngisaanut inissiisoqartillugu.

§ 4. Akissarsiortut, § 1, imm. 1 imaluunniit 2 naapertorlugu sulinngiffeqartut, piffissaq meeqqamik tiguvissartik sulinngiffeqarfissamillu sivilissusissaa, pineqartup paasiniariarpagu tamanna sulisitsisorisamut nalunaarutigissavaa.

Imm. 2. Sulisitsisorisamut nalunaarnissaq pissaaq piffissaq sulinngiffeqarfiusussaq kingusinnerpaamik sapaatip akunnerinik arfineq-pingasunik sioqqullugu. Pinartumik pisoqartillugu piffissaq sulinngiffeqarfiusussaq sioqqutitsiarlugu nalunaarutiginninneq pisinnaavoq.

Atuutilersinneqarnera

§ 5. Nalunaarut manna 1. marts 2010-imi atuutilissaaq. Ilutigitillugu naartunermut, erninermut meeravissiartaarnermullu atatillugu sulinngiffeqartarneq ullormusiaqartarnerlu pillugit Inatsisartut inatsisaat nr. 40, 23. december 1996-imeersoq atorunnaarsinneqarpoq.

Kalaallit Nunaanni Namminersorlutik Oqartussat, ulloq 26. februar 2010

Maliina Abelsen

/

Konny Olesen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat
Naalakkersuisut